

Kurdzanîn zirereke mezin ket (bi mûnasebeta wefatkirina Şekroyê Mihoyî)

Wezîrê Eşo....

Gelê Kurd lawekî xwe yê pir hêja, kurdzanînê -Kurdzanekî herî bi nav û deng, dîrokzaniya Kurdî- dîrokzanê xwe yê mezin unda kirin: heftê û heft saliya xwe da li paytextê Rûsiyayê-Moskovayê 1ê Sibata sala 2007 a ji nişkêve wefat kir pirofesor-doktor, endamê Akadêmiya Ermenîstanê ya zanyarê yê tam û tamam Şekroyê Mihoyî. Bi wefatkirina Şekroyê Mihoyî kurdzanîn bi giştî û dîrokzaniya kurdî bi taybetî zirereke mezin ketin, ber ku bilî bi cîanîna pir berhem-lêkolînên xwe yên ser dîroka Kurdistanê ewî weke organîzatorê kar û barê zanyarî yê êgin û jêhatî amadekirin û weşandina gelek lêkolînên kurdzanên dinê jî da bi cîanînê. Şekroyê Xudo Mihoyî sala 1930î li gundekî kurdan yê nawça Ermenîstanê ya Axbaranê yê Elegazê, ku berê jê ra digotin Camûşvana Mezin, malbateke kurdên êzdî da hat cîhanê. Piştî temamkirina dibistana gundê xwe ya navîn ew sala 1948an Înstîtûta paytextê Ermenîstanê-Yêrîvanê ya pêdagojîyê, fakûltêta wê ya dîrok-edebiyatê da hate qebûlîkirinê û gava ew di sala 1952 da tamam kir-vegeriya gundê xwe û dibistana wê da çend sala bû mamostayê dîrokê. Lê gava sala 1955a li Yêrîvanê ji nû ra rojname kurdî ya Riya Teze hate weşandinê-Şekroyê Mihoyî vexwendin, ku rêdaksiyona wê da wek serokê beşeke wê kar bike. Piştî zemanekî kin ev posta katibê rojnamê yê berpirsiyar da kifş kirin, ku weke cîgirê berpirsiyarê rojnamê dihat hesabandinê. Eva posteke bilind bû gava em wê yekê bigirin ber hesêb, ku Riya Teze dihat dîtinê wek rojnameke komara

Ermenîstanê ya ofîsiyêt, wek organa Komîta Navendî ya Partiya Ermenîstanê ya komûnîstiyê. Lê Şekro merem-mexsedek dinê dabû ber xwe : bi lêkolîna dîroka gelê xwe û welatê xwe-Kurdîstanê va mijûl bibe. Evê mexsedê ew bir beşa kurdzaniyê ya Înstîtûta Rojhilatzaniyê ya Akadêmiya Ermenîstanê ya zanyariyê, ku sala 1959 da hatibû çêkirinê. Hema li vira jî ewî têza xwe ya bendemanê zanînen dîrokî li ser Tevgera Kurdî ya Azadîxwaz li Kurdistanê Başûr bi cî anî. Çend sal jî buhurîn û destpêka salên 70î ewî eynî têma, eynî babet bi berfirehtir û kûrtir aliyê zeman û zanyarê da kir têza doktorê zanînen dîrokî û ew bi serkeftin di civîneke zanyariyê ya bilind û giran da parast. Çend sal jî buhurîn û ji ber zanînen wî yê zanyariyê yên kûr û nemaze li ber hesêb girtina kemal, talanta wî ya organîzatoriyê zanyariyê ew kifş kirin wek serokê beşa kurdzaniyê. Zemanê seroktîkirina wî da pir lêkolînên hêja di wê beşê da ser ziman, edebiyat, dîrok û êtnogirafiya kurdî hatin bi cîanînê.

Salên 60î Zanîngeha Yêrîvanê da beşa kurdzaniyê hate vekirinê. Şekroyê Mihoyî di wê da fêrên dîroka Kurdistanê bona xwendekaran bi cî danî. Ji ber vî karê mamostatiyê navê pirofêsoriyê yê bilind dane ser wî. Destpêka salên 90î Şekroyê Mihoyî hate hîlbijartinê weke endamê Akadêmiya Ermenîstanê ya zanyariyê yê tam û tamam û bû akadêmîkosê kurd yê yekemîn di nava govek, çarçova ne ku bi tenê Ermenîstanê, lê

ya temamiya Yekîtiya Sovyêtiyê ya Berê da di warê kurdzaniyê da. Piştî hilweşana Yekîtiya Sovyêtiyê weke dewleteke yekgirtî di sala 1991ê da, gava bi giranî bi sebebê sosyal-aborî zorî û zehmetî ber bi cîanîna lêkolînên kurdzaniyê û nemaze weşandina wan çê bûn Şekroyê Mihoyî destpêka salên 90î çû li paytexta Rûsiyayê-Moskovayê bi cî bû. Wî zemanî rewşa kurdzaniyê li Rûsiyayê jî, bi taybetî di nava du navendên wê yên li Moskovayê û Pêtrsbûrgê da jî xirab bibû. Kurdzanên wir weke pêwîste dîsa bi sebebê sosyal-aborî û kêmasiya finansan nikaribûn lêkolînên xwe weke berê bi rêk û pêk bi cî bînin û nemaze wana bidin weşandinê. Di vî warî da şuret û hunerê Şekroyê Mihoyî yê organizatoriyê bi kêr hatin. Ewî li wira Navenda Lêkolînên Kurdî vekir û di wê da, li dora xwe kurdzanên Rûsiyayê yên bi nav û deng civandin ji bona bi cîanîna lêkolînên kurdzaniyê û weşandina wan. Bi alîkariya sponsoran ewî bêtirî 15 pirtûkên kurdzaniyê li Moskovayê dan weşandinê yên ser ziman û zaravên Kurdî, ser dîroka Kurdistanê. Bi lêkolîn-pertûkên Kerîm Eyûbî, Î. Smîrnovayê û Zera Êsiv yên zimanzaniyê, lîngvîstîkiyê hate îzbatkirinê, ku zazakî û goranî ne ku zimanê cudane, weke hinek xêrnexwaz, dijminên yekîtiya gelê kurd, falsîtîkatorên zimanê kurdî hewil didan bidin qebûlkirinê, lê şêwe, zaravê zimanê kurdî ne. Destanîneke vê Navendê ya here mezin bû bicîanîna nivîsandin û sala 1999a weşandina "Dîroka Kurdistanê" li Moskovayê bi zimanê rûsî. Şekroyê Mihoyî bû berpisiyarekî weşandina wê pertûka zaniyarî ya giranbuha, ku tê da dîroka welat û gelê me li ber çavan hatiye raxistinê ji zemanê herb û dagîrkeriyên ereba destpêkirî hetanî rojên me. Beşê vê lêkolînê yên cuda-cuda bi cî anîne Şekroyê Mihoyî, M. Lazariyêv, M. Hasratiyan, J. Vasîliyêvayê, Jîgalînê û Bagîrov. Şekroyê Mihoyî mîrateke zaniyariyê ya

zengîn dû xwe hişt: Çend monogîrafiya, lêkolînên berfireh, bi deha gotarên zaniyarî. Lê ya here mûhîm ewe, ku ew xebatên wî ser asta zaniyariyê ya akadîmîsiyênîyê ya bilind hatine bi cîanînê û hêjayî nirxa mezinin. Li vê tangê me dixwest bal bikşanda ser wê yekê, ku weke dîrokzan goveka balkêşî, hewaskariyên Şekroyê Mihoyî ji tixûbê dîroka Kurdistanê Başûr, Tevgera Azadîxweziya Kurd li wira bi serokatiya Mistefa Barzaniyê Nemir derketiye. Ewî çend lêkolîn-gotarên zaniyarî yên giranbuha pêşkêşî dîroka Kurdistanê bi temamî, pirsgirêkên wê dîrokê yên aloz û ne zelal kirine. Sed heyf, ku mirina bêwa mecal neda, ku Şekroyê Mihoyî hemû merem û mexsedên xwe di warê bi cîanîna çend lêkolînên dîrokzaniyê da bi cî bîne. Yek ji wana bi cîanîna lêkolînekê bû ser Barzaniyê Nemir weke serkirda û serleşkerê mezin. Haya min baş jê nîne, kanê gelo ewî ew lêkolîn hetanî çî warî, çî qonaxê bi cî aniye. Lê eger ew nîvecî, nivîşkan maye, usane, me tiştêkî pir giranbuha û pîroz unda kir. Şekroyê Mihoyî welatparêz, kurddarêzekî bi şewat bû. Eva yeka zelaltir hate dîharkirinê, xuyakirinê nemaze nava kar û barê wî yê civakî da. Piştî hilweşandina Yekîtiya Sovyêtiyê dutîretî ket nava êl û olka kurdên Ermenîstanê, ku ji aliyê çend nijadperestên ermenî yên weke Yêxiya Naçariyan û Çarnîk Asatiriyân da dihate tûjkinê û gurkinê. Piştî ku kurdên musulman Ermenîstanê terk dan-çûn Rûsiyayê û li vira bi tenê kurdên êzdî man çend kurdên êzdî yên menfeetçî, kariyêrtîst hatin meydanê û gotin, ku êzdî ne kurdin, nijad, miletekî cudane, ku em gotî vir hada li Ermenîstanê bêjin û binivîsin "Gelê êzdî", "zimanê êzdîkî". Evê yekê rêaksiyoneke pir bi tûnd, pir bi hişk di nava me ronakbîrên kurd, rasttir, yên kurdên êzdî da yên Ermenîstanê da çêkir. Bi înişiyatîva Şekroyê Mihoyî

civîn, kongira me ronakbîrên li Ermenîstanê da bingeha Şêwira Ronakbîrên Ermenîstanê yên kurd hate danîne û Şekroyê Mihoyî jî di wê da hate hilbijartinê weke prêzîdent, serokê wê Şêwirê .Mexseda vê şêwirê ya bingehîn parastina navê kurdîtiyê bû ser olka êzdiyên li Ermenîstanê, ser ziman, çand û edebiyata me, parastina yekîtiya beşa milletê me bû ya li ser axa yekîtiya Soviyetiyê ya berê.

Şekroyê Mihoyî ji wan ronakbîrên kurd bû, yê ku em heval û hogirên xwe û milletê xwe di nava civaka biyaniyan, gelên cînarê me da bi giştî û di nava ronakbîrên wan gelan da bi taybetî rûsipî û serbilind dikirin. Salên 70î bû. Ez rojekê weke pir carên dinê çûm serlêdana lawikên me yên di beşa kurdzaniyê da li Akadêmiya Ermenîstanê ya zaniyariyê. Gava ez li Şekro geriyam-ji min ra gotin, ku ew hema vê demê Sêminarekê, raporekê bi cî tîne bona zaniyarên înstîtûtên Rojhilatziyê û dîroka gelê ermenî di serake Akadêmiyayê da. Min lezand wira. Sera bi zaniyariyên ermenî va çilk-çervn ra bû, derzî bavîtana-nediket erdê ber ku rapora Şekro ser rewşa kurdên Kurdistana Bakûr ya hemdem bû, ser babeteke usa, ku bi sebebê femdarî bala hemû ermeniyên û nemaze dîrokzanên wan dikşîne ser xwe. Tirs û xofekê li min girt û ez dilê xwe da difikrîm: "Gelo hogirê min wê bikaribe li ber gire-girên ronakbîrên ermeniya bi rûkî sipî bin vê berpîrsiyariya mezin û giran derkeve. Gelo gava dîrokzanên ermenî pirs û pîrsiyaran ser pêwendî, girêdanên ermeniya û kurdan zemanê bi cînanîna gênosîd, gelqirîya ermeniyên da bi destî ciwantirkan ji wî bikin ewê bikaribe ji bin wan pîrsiyarên giran derkeve". Lê Şekro raporeke aliyê zaniyariyê da haqa kûr û temam bi zimanekî ermenî yê dewlemend û xweş bi cî anî, ku kêfa zaniyarên ermenî jê ra hat, ewana pîrsiyarên xwe yên bi tehlîke ji bîr kirin û dawiyê da her bi tenê bi zemanekî dirêj dest, çepikên xwe li hev xistin. Gava ez ji

serayê derketim min dilê xwe da got: "şîrê te li te helal be, Şekro, te em çawa rûspî û serbilind kirin", û gava ez di kolanê da dimeşiyam min hew tirê ser pembu û zembelean dimeşim; lingên min ji şabûna erd nedigirtin. Piştî temambûn, xilasbûna kongira me ronakbîrên Ermenîstanê jî, ya ku min li jorê besa wê kir, şayra ermenî ya mezin Sîlva Kapûtîkiyan nêzikî min bû û derheqa rapora Şekro da wa got: "Minê pir bixwesta, ku hinek ronakbîrên me yên ermenî jî weke Şekroyê we yê Mihoyî bi ermenîke wa bijare, wa dewlemend û xweş axaftin bikirana". Li vir jî ez ji ber şabûn û serbilindiyê weke elokan di xwe da werimim. Ez xwe bextewar dibînim, ku min ne ku bi tenê Şekroyê Mihoyî naskiriyê, lê bi wîra hevaltî û hevkarî jî bi cî aniyê. Hevkariya me ji rojname Riya Teze destpê bû, gava ewî bi amadebûna min serrastkirina gotarên min temam dikir û ew ji bona weşandinê bi rê dikirin çapxanê. Gava min nîveka salên 70î werger-lêkolîna xwe ser berhemên ronakbîrê ermenî yê mezin, dost û xêrxwazê gelê kurd Xaçatûr Aboviyan temam kir, Şekro ra got, ku ew bibe rêdaktorê wê yê berpîrsiyar ji bona weşandinê. Ewî ew xebata min ji destê min girt bê ku konkirêt sozekî bide min. Piştî xwendina wê ewî ne ku bi tenê ew wezîfe hilgirt ser milên xwe, lê bi ser da jî pêşgotinek ji bona wê pertûka min nivîsî û di wê da keda min jî da nîrxandinê. Çend sala berê li bajarê Almaniyayê-Wûpêrtalê gotî xelatên Komkarê bidana çend ronakbîr, hunermendên kurd û di nava wan da -Şekro jî. Komkarê rê tê ra dît, ku weke welatî, hogir û hevkarê wî û weke kompêntent, zanê kar û barê wî ez di mêrasîma pêşkêşkirina xelatan da axaftinekê ser Şekroyê Mihoyî û jiyana wî ya berhemdariyê bi cî bînim û wê xelatê bi destê xwe bidim wî. Min ew spartin bi şabûn û ser bilindî bi cî anî. Piştî civînê Şekro ji min re got: "Te

axaftineke xweş kir, lê pesnê min pir da". Hevdîtineke min û Şekro, ku piştî serlêdana min ya li Herêma Kurdistanê di buhara 2002an çêbû, min jê ra got: "Şekro, min merem daniye ber xwe, ku lêkolînekê bi cî bînim li ser kar û barê Barzaniyê Nemir li Yekîtiya Sovêtiyê, ber ku di vî warî da valahiyek çê bûye û ew kar û bar bi temamî û hêjatî nehatiye raxistinê, li ber çavan, nehatiye nirxandinê". Şekro boyî vê yekê pir kêfxweş bû, lê gava min gotina xwe anî ser wê yekê, ku ew bibe asîstanê min weke Barzanîzan û rêdaktorî, berpîrsiyariya weşandina wê lêkolîna min bike, ewî bersiva min wa da: -Bi şabûn, Wezîr. Ezê bi ser da jî weke rêdaktorê berpîrsiyar pêşgotinekê bona wê pertûka te binivîsim. Xweş nivîsî!.. Ne pêşgotin bi cî anî, ne jî xatirê xwe ji min xwest: piştî xwe da min û çû; ez xemgîn û sergerdan hiştim. Çima, Şekroyê bira? Ne axir bilî xeberên xweş û rêzgirtina te min qet carekê jî gotineke sar nedabû destê te. Lê te çima ez li Awropayê, nava xerîbiyê da bê berbîn hiştim? Rast e, hogirên hêja dîsa hene, lê weke gelê me dibêje, her gulek bînek jê tê, lê bîna te jî pir xweş bû, welatiyo û hogiro: wek bîna gul û gîhayên zozanên Kurdistanê. Sala 2006an havînê Şekro serlêdaneke bi sirê li Herêma Kurdistanê bi cî anî. Gava vegeriya Moskovayê ez bi telêfûnê ji Brûsêlê pê ra peyîvîm. Pir kêfxweş û serbilind bibû ji ber avadanbûn û gulvedana Kurdîstana Azad. Lê gava pirs û pîrsiyara rewşa min kir min jê ra got: "Şekro, vî temenê

kalemêrtiyê da ez ketime nava xerîbiyê, eva yeka giranîke pir e ji bona dilê min yê tenikbûyî". Dest xwe da bersiva min da, weke xwe cara li min hate şîreta: "Ez zanim derman, melhema dilê te yê xemgîn çiyê: rabe here ziyaretkirina Herêma Kurdistanê û dest xwe da ew xemê giran wê ji te birevin". Ez piştî çend mehan hatim beşê welatê xwe yê azad, xem ji dora min çûn, lê hema li vir jî besa wefatkirina te gihîşte min û şabûn di nivê gewriya min da ma. Tu xêrxwaz, dilêş û berbîna min bûyî, lê te çima ji nişkê va ev bêdadî, ev nemamî ji min ra kir, hogirê ezîz? Şekroyê Mihoyî heftê û heft saliya xwe da wefat kir. Eva temenekî ne hindike, ne kême, gava em wê yekê jî bigrin, ber hesêb, ku pir mezin ciwaniya xwe da ji vê cîhanê diçin. Lê em gotî gotineke aqilbilindekî cîhanî yê zemanê kevnare jî bigirin ber hesêb, gava gotin tê ser wefatkirina Şekroyê Mihoyî. Ew aqilbilind dibêje, ku mirina ronakbîrê berhemdar yê ku hêjî diafirîne çî temenî da jî dest bide ya ji zemîn zûtire. Em vê gotinê tam û temam dikarin hindava Şekroyê Mihoyî da bi kar bînin. Her bi tenê ew yek ji me hogirên wî yê qelemê ra dibe sebir û sikan, dibe stûneke stûr dikeve ber dilê me yê şikestî, ku bîranîna wî ya geş û ronik wê heta dawiya jiyana me dilê me da bimîne, lê navê wî yê hêja û bilind jî-nava gelê wî yê bi şêkir dahetanî dîrokzaniya kurdî hebe.